




Mei 2011

Edishon 4 Aña 1



*Aparensia ta
gaña hende, i
beyesa ta pa un
tempu, pero
felis e muhé ku
ta teme Dios.
Henter pueblo
ta dun'é honor
pa tur loke el a
hasi.*

*(Proverbionan
31:30-31)*



Boso mester tin e
mesun aktitut ku
Kristu-Hesus
tabatin
(Filipensenan 2:5)

Muhé.....

Den un hende muhé promé ku tur kos mester resaltá e dignidat i responsabilidat ku e tin pa su mes i su famia. ...Dignidat i responsabilidat di un muhé... Bo sa ku ta un privilegio di ta un muhé? No ta pa medio di un muhé Dios Tata a laga su Yu bira hende pa nos? Nos, muhénan, ta karga e rikesa di mas grandi den nos: DUNA BIDA. Nos komo tèmpep di Spiritu Santu, sa di RESPETA BIDA. Aseptá awor tambe e reto di ta muhé i sali na vanguardia di e PALABRA DI DIOS ku ta duna bida. Laga e palabra inspirá bo kontinuamente den ehèmpel di bo amor, bo ternura, bo konfiansa, den bo guia, den bo fe. Kumpli i mantené asina bo responsabilidat i dignidat. Asina for di nos, muhénan, mester resultá: -bon boluntad pa un bida salu, sano, plasentero i felis, ku nos ta kompartí ku tur hende, grandi i chikí, hòmpber i muhé. Bo ta konsiente ku bo ta krea pa duna bida? Bida!



Amor di Mama.

Mama, ta e promé palabra dushi di bo infansia, i no ta eksistí den mundu bondat mas grandi ku esun di dje. Ta e so ta komprondébo, ta protehábo, ta guiabo. E sa di lesa den bo kurason, semper lihé pa pordoná bo erornan. Hasi tesoro di tur su konsehonan, pasobra dia e ser yama pa reposo eterno, lo bo sa kon tristu ta, di ta so den mundu.

Famia i Komunidat

Famia Kristian.

Ningun hende ku dos dede di frenta ta duda ku famia ta forma e fundeshi di un komunidat, ku e ta e sélula di un sosiedat kristian, e sentro di edukashon i formashon kristian.

Esnan ku haña e privilegio di por a lanta, krese den un famia bèrdaderamente kristian ta keda agradesido, henter na bida largu, pa e fabor aki. Un famia kristian no ta un famia laf, demasiado serio. Den un famia kristian nan por hari i hasi hopi prèt, tèr otro i tambe pone otro rabia, duna otro un kara abou, ku un sonrisa, sin bira falsu. Nan no ta santu i den ningun sentido beato. Pero den nan famia nan no ta permití un "free for all". Ta reina un disiplina normal, no eksagerá.

Mayornan ta trata di duna un ehèmpel bon kla di rèspèt pa ku otro, pa ku nan yunan, pa ku bisiaña, pa ku outoridatnan, pa ku mama tera ku su naturalesa. Sobré todo den un famia kristian nan ta pone atenshon riba balornan spiritual i moral, tene kriterionan étiko na serio i na haltu.

Nan ta karga responsabilidat pa ku otro i pa ku nan komunidat. Di e manera aki nan ta konstruí un kas di famia kaminda e yunan ta stima, protehá, apoyá, kaminda nan ta haña tur posibilidat i kapasidat pa prepará nan debidamente pa nan propio futuro.

Bendishoná e muchanan ta, ku nan mayornan ta ofresé nan un ambiente kariñoso i sano kaminda nan ta siña hasi bon uso di nan libertat. E porvenir di mi pueblo por ta briante solamente ora nos famianan no krea un mundu artifisial sino un mundu kaminda rèspèt tin contenido, den kua Dios ta haña e promé i prinsipal lugá.

